



Nuummi illut minillugit Illunik aningaasalersuisarnerup, niueruteqarnerup attartortitsisarnerullu unammilleqatigiinnermik tunngaveqarnerulernissaat pillugu 2020-mi Upernaakkut ataatsimiinnissamut najukkani assigiinngitsuni illut suuneri najoqqutaralugit periarfissat pillugit nalunaarusioqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Nalunaarusiami aamma ineriartorneq tamanna siuarsarumallugu periarfissaasinnaasut pingaarnersiorlugit allaasereqquneqarput.

(Inatsisartuni ilaasortaq Justus Hansen, Demokraatit)

(Siullermeerneqarnera)

Inatsisartunut ilaasortap Justus Hansenip uani siunnersuutigaa Naalakkersuisut peqquneqassasut UPA 2020-mi nassuiaammik saqqummiusseqqullugit, naluaarsorlugu najukkami illut pillugit suut periarfissaanersut. Siunertaavoq - Nuummi illut minillugit - unammilleqatigiinneq tunngavigalugu illut niuerutigineqartalernissaat - aningaasalersuisarnissaq eqqarsaatigalugu.

Nunap aningaasarsiornikkut patajaassusaa taamatullu peqqissuseq pilersinneqartarpoq tunngavilerneqarlunilu innuttaasut ataasiakkaat illuminnik nammineq piginnittuunerannit. Tamatumunnga pissutaavoq, innuttaasut ataasiakkaat namminneq akisussaaffigisarmassuk illumik pisinermi namminneq aningaasalersuinissartik aserfallattaaliinissartillu. Taamaasilluni inuiaqatigiit illuliornissamut aserfallattaaliinissamullu atugassanik aningaasanik sipaartinneqartarput.

Aammali innuttaasunut ataasiakkaanut assiganik sunniuteqartarpoq innuttaasut illu nammineq pigisarmassuk. Piffissap ingerlanerani innuttaasoq aningaasarnikkut imminnut tunngavissittarpoq- tassa utoqqalinissaminut ileqqaartarpoq.

Ullumikkut innuttaasut 30 procentii nammineq pigisaminnik illoqarput, sinnerili 70 %-t pisortanit inissaqarnikkut isumagineqarput.

Nunanut allanut qiviarutta kisitsisit killormoorput. Nunani killerni inuttaasut 85 %-ii nammineq pisiameinnik illoqartarput.

Pisortat pisussaaffilerneqaraangata innuttaasunut inissaqartitsissallutik - naak namminneq imminnut illussaqaarnikkut isumagisariaqaraluartut - taava pisortat pisussaaffilerneqartarput sanaartornermut aningaasartuuteqarujussuarnissaannut. Kingunerisarpaa inuiaqatigiit iniminnut qilersorneqartarnerat naak aningaasat atornerqarluarsinnaagaluartut innuttaasunut ataasiakkaanut sullivinnullu pitsaasunik sinaakkusersuinerlut.



Inuiaqatigiit innuttaasunut taamaallaat illuliortassapput, ikiortariarialinnut, innuttaasulli sapinngitsut namminneq illuliortariaqarput imaluunniit allatigut nammineq illutaarnissartik isumagisariaqarpaat.

Demokraatini isumaqarpugut siunnersuut manna pitsaasuusooq pingaaruteqarlunilu. Qanoq iliornikkut inuiaqatigiit sinaakktissat pitsaanerpaat pilersissinnaavaat ataasiakkaat nammineq illutaarsinnaanerat qularnaarumallugu ataasiakkaanut iluaqutaasumik aamma inuiaqatigiinnut? Taamaattumik nassuiaasiortoqarnissaa pisariaqarpoq, qulaajarlugu nunatsinni sumiiffinni assigiinngitsuni atukkat suut atuunnersut aamma tamakku qanoq iluarsineqarsinnaanersut. Peqataanik aamma pisariaqarpoq nalilersussalugu taarsigassarseeriaatsit pisortaneersut qanoq ittut atorineqarsinnaanersut.

Demokraatini isumaqatigilluinnarparput inissaqarneq unammilleqatigiinnermik tunngaveqassasoq. Aamma pisortat taarsigassarsiisinnaanernut periarfissat pineqartillugit.

Naalakkersuisut akissuteqarnermini allaannguutissamik siunnersuuteqarput. Allannguutissatut siunnersuut susoqannginneranit pitsaaneruvoq, siunnersuutilli Inatsisartunut ilaasortap Justus Hansenip saqqummiuteqqaagaanut naleqqiullugu pitsaanerunngivippoq. Taamaattumik Demokraatini innersuussutigissavarput ataatsimiititaliap sulinermini siunnersuutaaqqaartoq suliarissagaa.

Taamatut oqaaseqarluta Demokraatini siunnersuut Sanaartornermut Ataatsimiititaliamut ingerlateqqipparput suliassanngorlugu.